

摘藻堂四庫全書薈要

集部

欽定四庫全書薈要

集部

圭齋文集卷十



欽定四庫全書薈要卷一萬六千四百八十三

集部

圭齋文集卷十

元 歐陽玄 撰

墓碑銘

元故中奉大夫江南諸道行御史臺侍御史劉公墓碑銘



至元元年冬十月江南行臺侍御史錨公未引年拜疏致仕歸長沙二年夏四月丁酉薨於私第是年冬十二月以治命葬湘西嶽麓山之原湖南憲使汝南梁公遺

既志其藏諸孤奉行實來瀏以墓表屬於契家廬陵歐陽玄請文志諸石按公諱宗說字傳之世成都華陽人大父宋末嘗為茶陽軍使因家鄰境之攸輿幼侍祖父遠宦嶺外既孤適遭宋亡克自樹立從鄉先生趙公朴學於宜春年十二三能屬文有才諳踰弱冠以薦補廣西憲史再辟湖南貢南臺察院史歲滿調衡州錄事判官中書刑部辟職官史皆未赴臺除廣西憲司照磨選充南臺掾改湖東憲司照磨仍留掾南臺擢海北憲司

經歷遷河南憲司經歷拜南臺監察御史轉河南浙江  
兩行省員外郎江浙未赴改南臺都事入為中書右司  
都事拜內臺監察御史將進臺都事力辭出為山南浙  
西兩道肅政廉訪副使復被選為臺都事俄出為淮東  
道肅政廉訪使陞廣西道肅政廉訪使移江東道肅政  
廉訪使召拜刑部尚書尋歸休于家起為江南諸道行  
御史臺治書侍御史陞侍御史積階中奉大夫公啟歷  
臺省諏咨四方出處偉節規撫古人初掾桂臬訪故父

旅殯行諸蒼梧即投檄辭歸以申情事孝節著聞見器  
諸老厥後宦業浸盛受知文皇主畫中臺上所親擢侍  
燕內廷鬚髮盡白或謂公老上曰傳之在南臺已然此  
正老成可用之日也公被眷遇知無不言進退有度縉  
紳則之移疾告歸上弗能強廣右之命公去留之疾愈  
治行益用見信及以秋官召還文皇賓天遭時多艱大  
獄屢起語連宗親公公正不撓刑無濫施事定勇退論  
公生平忠孝大畧於此槩見所至蒞政詳明用法矜恕

挺囚藤梧寇黃京失脅愚民為亂有司坐首從皆死公  
誅渠魁四人餘四十二人免家屬論徙遼陽肇州公謂  
驅炎墟之民居沍寒地名為減死實置死地請留嶺南  
屯田全者六百餘口讞獄閩浙言海寇初皆王民身陷  
惡地無由自新宜許以贖罪復業後用其言盜皆為農  
河決大梁城門不開公按視得高陵撤相國寺朝元宮  
木為橋百餘丈道民循城顛行薪米不絕比屋乃炊河  
決小黃村陳顥千里皆沒公督有司盡力鍵閉河復故

道流離日還淮東大饑勸分維揚一日得楮幣十五萬  
八千八百餘緡所賑以戶會三十一萬三百有畸以口  
計一百一十四萬一千八十故公政聲發軔海嶠振于  
河淮由平反恤災之功居多至於吏能則在中書右司  
兩月掾屬心服其竄正吏牘運筆如飛造次之間辭理  
俱暢在刑曹半年滯事悉決乃定遇草刑制七十六款  
頒示天下無復質疑公處察案退然一儒未嘗少自銜  
襮獨善善惡惡無所避覲在河南時薦前憲使韓從益



行省郎中納琳等二十七人為刑臺御史薦浙西憲使  
許思敬戶部尚書喀爾田河南行省員外郎胡彛等五  
十五人乞召還敢諫御史李謙亨成珪於竄所乞叙用  
故臺臣益陵真中丞苗侍御等八人於家劾前中書左  
丞黨附權臣暴斂為虐劾河南行省叅政往括田江西  
橫歛府縣激變為廣右掌政能制僉憲不敢為苛為南  
臺幙賓力斥中丞繩下之酷為荆憲黜賍吏三百九十  
八員汴蒙古都萬戶畜巨獒納豕肝肺芻人腹中習獒

咥人軍士忤已輒嗾殺之公正其罪江陵豪僧謀人获  
園誣以殺三僧焚之置三豕心燼中為驗公辨其詐抵  
僧罪釋無辜二十一人湖廣辨章章征徭恒怯公奏罷之  
古縣戍將據校官毀宣聖像公定罰錮之海南其劾閩  
憲聲跡兩使者望風解印嘗不就江西行省辟掾時相  
為之慚色自居下僚比至要塗論事英發往往洞識治  
體至大中陳革弊防姦戢貪除暴等十事又言六品以  
下封妻不及父母非人子志後封贈倏罷又力請復之

延祐中請置東宮弘文館選端人為宮教博士講六經以輔儲德又請除逃戶糧置迤北沿河倉儲節臺中罰布之用以助賑濟權古今錢幣之制以便小民至順中言盜駝馬牛羊罪當為等差百官名在罪籍不宜普該恩澤或至再叙侍文皇清燕密上封事其目曰明人倫序宗族命賢相慎殺戮義取仁守保全功臣貶酒闕色親忠遠佞儒臣進讀宜講帝王之道勿事浮靡罪人妻孥分賜臣下宜別宗親以存上下之分皆稱上旨凡所

建明咸以著為令或遇布政輒在議中其惠利久遠若築堤海康闢田萬頃以徠海外耕民海北民鬻食鹽又輸鹽丁錢公奏弛其征文皇居潛瓊筦以是知公疾草猶索紙筆作遺表欲有所陳未成而薨年六十有九曾祖鑑宋宣教郎祖景高宋韶州通判贈嘉議大夫禮部尚書上輕車都尉追封彭城郡侯父重坤贈中奉大夫四川等處行中書省叅知政事護軍追封彭城郡公娶毛氏繼娶王氏皆先公卒並追封彭城郡夫人再娶張

氏三子長孝友承事郎岳州路經歷公未寢疾奉命展  
省先塋聞訃得疾後公六十一日卒次孝敬登仕郎永  
州路知事辟湖廣省掾史次孝恭廣西道宣尉司照磨  
女五長適江西鄉貢進士張仁偉次適巴延次適卜德  
生次適孟坤珍次適歐陽忠皆士族孫男四好禮好義  
好信苟兒孫女三觀音奴觀奴永安奴公博學強記淹  
貫經史以禮部公號雪界因號雪峯以志蜀土有奏議  
詩文若干卷傳于世早從涿郡盧公虔道學詩擅名古

體廬公憲湖南嘗語人曰錙掾傳之天資高邁他日綱維風憲必斯人也及公為臺端衆咸以為知人玄先君子內翰公于錙公契友玄辱知尤深在曹監時嘗遣子孝恭受業館下誼不得辭乃叙而銘之辭曰溫溫劉公如玉不瑕臨事決義蹇蹇法家以儒發身以學施政措為治才著為辭令惓惓告君懇懇許國粵有風紀我扶我植自厥筮仕奮由承掾迄其懸車終始司憲入也獻替出也諮詢官之準人邦之蓋臣文皇知公字而不名

雖閔勞勩實仗老成上飲公醇公疾弗勝有殽有核賜  
以豆登丹頰白鬚拜起給扶尚竭心智載陳謀謨秋官  
予環遷出綴衣有執國柄赫赫作威公職司平獨立無  
悚止辟不淫展也仁勇卜居長沙謝事建鄴輕舟來歸  
賦詠盈篋胡不百年為國著龜明禋召從疑事就諮蒲  
輪未臻榆沈斯作塋以公輜率履無忤子孫詵詵世被  
德馨節惠有典祇此貞銘

元贈從仕郎吉安路吉水州判官周君潛心墓

碑銘

安成周君潛心卒之五十九年以子貴有卹典於朝將  
錄其副以告墓次其孫絢奉其宗人南瑞所狀行來京  
師謁銘於予維周氏姬姓歷秦涉漢初至三國兩晉多  
名臣載史傳唐季有諱璟亦有聞當時其四世孫威避  
難遷金陵威子矩仕南唐至御史壻楊竦為吉州刺史  
矩至吉因家焉二子長翰次羨羨登宋建隆間第積官  
光祿大夫卒贈僕射又遷屬邑之西昌其族蕃衍科第



相望部使者號其里曰爵譽羨子廷訓仕至供奉廷訓  
子昭為江陵令卒贈殿中丞有五子次子大理評事中  
師生度化少府壽之壽之子情遷安成之後林里又四  
世為潭州通判士貴士貴子人望人望子繼祖是為周  
君之父君諱晞顏初字景顏後字潛心自童壯器如成  
人年十有六喪父內保家訓外親良師友奮自樹立稍  
長脫去拘攣識趣軒朗舉措不擾才力恢恢至元丙子  
江南初內附官府易置世務方殷故宋吏胥挾文為姦

里無賴又為囊橐善良重足而立君以孤遺出應門戶  
機警辨惠果決有謀既足自彊又能為姻族鄉井捍禦  
外侮衆皆倚之為安兄志伊蚤世君撫其孤不翅已子  
先業粗給君善經理遂至贏餘推其所有輒濟貧乏惟  
浮靡虛誕之士雖數干請秋毫不可得居鄉善善惡惡  
予敘不偏訴訟有未之有司而先質正於君者陳義秉  
法而劈析之咸得肯綮器俗為息江西行省郎中杜仲  
寬聞君之賢方薦君進用俄抱病歸未幾卒於家年裁

三十有三初娶王氏先三年卒再娶觀溪劉氏五年而君卒初錙氏之祖母亦蚤寡以貞節聞辛勤教子後皆擢科湖南轉運司帳管斗則劉氏諸父南康主簿玫則其父也錙氏在閨門時習聞劉母懿範故能守節自誓又能以教子為先務次子遺腹所生日抱之泣行道聞而哀之君柩久在藪不葬人問之曰吾婦人安曉葬書俟吾兒長自卜其地且未亡人守此柩日夕與俱猶同返窀穸也遣子就學歲時從師之禮無闕否則質簪珥

以繼二子感激孝養備至學殖日勤今皆成立長毅用  
憲司試為瑞金縣儒學教諭陞吉安路學正借注廣州  
新會縣藥徑砦巡檢辟廣東元帥府令史從元帥平循  
潮二州寇有功遷桂陽路總管府知事有政績湖南憲  
課其最嘗平反死囚二人及去官為立生祠歷兩考進  
階從仕郎贛州錄事次恒以儒推擇為臨江贛兩路掾  
歲滿為上猶縣典史毅仕至七品君得贈官其配亦追  
封宜人君卒以至元戊子六月十有四日葬以大德庚

子十月十有九日墓在州北清化鄉鄴城里銹氏卒以  
泰定丁卯四月十有九日年二十有七失所天六十有  
六而終塋以至正辛巳十二月十有七日墓在新樂鄉  
之山塘祔姑李氏阡女一人王氏出適進士彭躍龍子  
務德孫男四人絃絢浩澄孫女三人曾孫七人君初失  
父遭時孔艱及其自立涉世又淺而鄉曲之譽流芳無  
窮歿世之後家有節婦門有孝子克允厥宗子宦業日  
盛國家飾慎終追遠之惠方來未涯是宜有銘銘曰行

以集義僅施於鄉為善竭力得年不長數有乘除分有  
豐畜已播弗獲後人是食趙祚既訖君方弱冠家緒不  
蠱君植之幹善負奇氣不為俠資救難則勇恤孤則慈  
視前斯振顧後斯燾年不滿德君子是悼有婦誓節志  
不負君有子力學底績於文生也曠遼一命若訥贈恩  
便蕃子仕方進有源斯委孰禦其沛博史作銘以訓未  
父

元贈奉議大夫樞密院判官驍騎尉追封浦江

縣子鄭府君墓碑銘

大江之南淝河之東有州婆有縣浦江有旌表家鄭氏  
九世同龔朝廷嘉而旌之至是又有贈典告於其家是  
為樞判府君由其子深起家為右丞相太傅府長史階  
正六品初贈國子監丞及深遷宣文閣鑒書博士階正  
五品當進贈其親故府君有是命也府君諱銳字景敏  
其先滎陽人十一世祖曰凝道遷歙凝道子自牖遷睦  
之淳安自牖之孫淮遷浦江淮樂善好施宋靖康年饑

鬻田千餘畝以賑其里人號所居曰仁義里淮之孫曰綺號冲素處士事二親盡孝父照忤時貴得罪文以重辟綺上書郡守錢端禮乞代父坐法守為之直其父冤母張病痺手足皆廢三十餘年凡就便液綺必抱持其主家政歲入絲粟不私鄭氏九世不異財實自綺始綺之玄孫龍游丞德珪青田尉德璋尤篤友誼怨家以死中璋法當逮維揚珪請于有司以身代璋行竟死逮所珪子文嗣璋子文泰皆克紹一門薪餐食指數百如出



一身令刺史舉察以聞旌表其門曰義泰二子長銳即  
府君幼穎悟日記數千言長明春秋事母賈孝竭力以  
供子職賈病晝夜衣冠以侍湯劑者數十日無懈容其  
與兄弟處表裏始終無間言怡悅見於顏色嘗典義財  
每自勗曰吾家累世義居至吾之身或墜先訓萬死不  
足以贖媿乃創為式用財纖悉必附日乘月吉以似家  
長署而通考之由是鈎檢有法一如官寺規可以久性  
勤儉任事不憚勞有餘即好施見里之貧約必思有以

賑之暇日習詩及小楷殊有思致延祐甲寅初科以明  
經貢於鄉一試不偶即舍之曰當以付吾後人生以至  
元己丑之二月二十有七日卒以延祐庚申之十有二  
月一日壽三十有二聞其訃者咸悼其蚤世明年辛酉  
三月三月初塋義烏縣延壽山之原今改本縣靈泉鄉  
娶樓氏子二人長深次淇深字浚常失所依恃二十餘  
年負笈入京以文行受知前太傅右丞相被選為長史  
推恩及君贈承直郎國子監承樓氏封恭人及深遷宣

文閣受經郎再遷鑒書博士擢吏部員外郎今除僉江  
南浙西道肅政廉訪司事君進樞密院判官勲驍騎尉  
爵浦江縣子階奉議大夫樓氏亦累封浦江縣太君深  
於予有斯文之契以福建廉使貢公師泰所為行狀來  
謁銘辭不獲序而銘之銘曰昔在唐虞風俗淳美史稱  
可封比戶皆是降及戰國阡陌既開史稱素封實雄於  
財鄭門九世資義不竭使居唐虞在可封列家擬素封  
惟義發身致有誥命受封惟貞司造孔明無善不報惟

樞判君實踐允蹈孝親友兄悖族睦鄰樽用致豐植弱  
賑貧義規我守義產我掌有勾有稽有籍有帳學明麟  
經一試場屋出抱遺編以受子讀子蔚有文進遇東閣  
謀裨鼎軸畫主帷幄再遷宮師授業內庭祕閣鑒書講  
筵譯經乃登要津判銓天臺維君恤典恩寵鼎來進班  
宥府錫爵蒲壁義門日宗車駟翕艷靈泉新阡遷自烏  
傷太史勒銘奕葉有光

元贈應奉翰林文字從仕郎安成劉聘君墓碑

銘

國子助教銹君文廷既陞于朝當推恩其親天官為之  
擇館閣美名以居之於是贈其先君子劉公以應奉翰  
林文字從仕郎應奉即唐供奉金人避其主嫌名改今  
稱國朝因之雖七品階實北門詞臣惟朝士知名者得  
以是榮其親文廷將歸燎黃于阡狀其先德謁銘于余  
余至順庚午校藝南宮文廷余所得士也為國子祭酒  
又同在胄闈故為之叙而銘之叙曰公諱蒙正字聖功

安成漢為縣屬長沙國劉氏為長沙定王後故家焉公  
十四世祖曰五處士初徙城西湯村晉安復縣也處士  
生唐末五季有善行于其鄉涉宋三百年錙氏科第相  
望皆其後人公幼有宿慧五歲屬辭八歲能舉子業號  
曰奇童父嘗携之貴人家貴人命以賦援筆立成思致  
不凡坐客歎服一日父子役公戲母周夫人側適諸父  
夜課子姪以鄉校賦題燭跋未就周夫人曰諸兄方苦  
吟兒則戲劇何為公俄默若有所營泫頃曰兒賦就矣

索紙筆寫之周夫人命以質諸父諸父為之失色以示  
諸郎曰若輩徒長大曾不愧是兒明日賦傳誦衆口鄉  
前輩爭造門呼出觀之居無幾世改科廢公年方富才  
器卓犖自以用不適時浸不屑為章句習會丁外艱撫  
事增悼終喪辭周夫人南遊衡湘常悵悵不樂喟然嘆  
曰大人在菽水之養不可久違箕裘之業不可久棄幡  
然歸故廬盡發先人遺書淹貫六籍馳騁百家旁及盤  
盂隱奧虞初稗官靡不搜抉已乃大肆力於文沛然出

其有餘沾被學者四方負笈及門如適工倬長短大小咸中矩矧它匠棄捐悉就斲削以公能誘人知方使厭飫日趨不容柅也性豪舉曠達先廬故占勝地猾鄰乘公出誘大駟暗據規為已有諸從異懷不能制公還誓必復之駟亦難公奉歸侵疆公拚除塙葺招復徙者隣以是嘆公會歲侵鄉田不毛隣劫於征布以計弛其肩於公人謂勢必反之不則病公曰人憊故求更憊而返之不仁里有貧不能輸者毀家以代之由是生計滋削



然終不咎隣獨自責曰居不擇隣非智去之龍雲溪上  
居焉溪上多故人士族樂公之遷遣子弟受業恐後四  
方勞問繼屬公內給太夫人甘膳之需外脩諸士友綢  
繆之好晚況殊適環堵蕭然戶屨常滿興至觴詠賓主  
盡歡高談善謔傾倒四座酒酣取古人詩文擊節而歌  
聲沮金石踈髯古貌臞如列仙睥睨世故無足芥其胸  
次者一日飲傍舍莫歸沾醉就寢丙夜家人聞呻吟起  
問安公曰吾舊疾痛亘心膂歲常殆今二十年復作其

不瘳乎詰朝更數醫皆卻其藥不飲七日忽宵興正冠而坐召諸子語不及他唯以不得終養太夫人為恨言訖而瞑皇慶壬子十二月二十有九日也年五十有三疾初作周夫人已卧病公卒七日周夫人亡明年正月十有一日諸孤用治命奉公柩葬於故廬之陰曾大父繼周大父先登父雲鳳皆為鄉名士娶朱氏以子貴封宜人子四人長聞即文廷登第後調臨江錄事有善政居成均事稱其稟以善教名次閑次閑次閑皆以經教

授女二人長適賀氏次適張氏孫男女十三人公篤於  
孝友弟應龍幼孤妹歸李氏早寡于時饑饉師旅相仍  
公避難崎嶇往來百里間撫孤存寡恩極周緻家雖貧  
所識空乏即解衣推食無靳居鄉曲有譽處豪右有道  
雖不好以氣岸加人而見者自失其負挾平生喜讀書  
過目成誦朋友訖疑隨事疏答云出某書見某注如腹  
有笥然為文渾厚條達不事奇澁下筆輒數千言雄議  
疊出多裨益世教切中治體人稱其有大對掄魁之材

尤善知人誠僞策事成敗橫逆無故至前了不為動人驟遇之見其高世不羈之材未容輒致親附而明白坦夷雖家人細故不以欺客退而消去鄙吝終身不忘雅不喜浮屠幻妄之說聞朋友有佞佛者移書切責鄉先生若靜德王公聖與青山趙公儀可復心崔公君舉養吾劉公將孫皆折輩行友之科詔既下公讀而喜曰吾老復見場屋寧非天乎尋至物故齊齋彭公長庚祭以文曰科目方興而伏生死禮樂將用而河汾亡其見重

名士如此公號山泉先生有美曠集若干卷學者傳之  
既沒士人見論事不痛快臨文不強人意輒太息曰安  
得復見劉山泉先生銘曰公之學碩以多可擢魏科公  
之詞雅以麗可司帝制有其學不科其擢父懷其璞子  
獻其穀有其詞不制其司生背其馳死踐其資其有不  
居其蓄不祛其達敷腴其儋寓諸茫茫九京公莫起矣  
瞽宗有辭惇史有調

元故徵士段公禮廷墓碑銘

有元徵士段公禮廷既塋之十年其孤德輔德文介余  
故人之子聶孟宣以公之行實謁余請銘其墓道之石  
予始辭之孟宣請益謹乃述其行而為之銘維段氏廬  
陵之龍溪人入唐以來代為顯官有積階至銀青金紫  
者公諱士龍字雲亭禮廷其號也曾祖仲仁祖文郁父  
子開字叔茂號真逸處士始遷長沙城中三世皆有德  
之士公本真逸族子宋季段氏有登進士第卒官成都  
華陽主簿諱文煥者公所生曾祖也以詞賦兩請漕貢

進士諱議孫者所生父也內附初世故多艱貢士往安  
成依妻家劉氏以居前至元辛巳公生劉氏家年九歲  
外祖劉梅憲先生奇其穎悟真逸無後詢之族屬求可  
為後者見公拊之曰吾行四方閱人多矣是兒能振吾  
宗者請以為子貢士持不可貢士沒母劉氏辛勤自立  
教公從師受學甚謹又九年真逸申前請彌切乃許以  
為後時真逸以貲雄于長沙得公幹蠱甚副所願公事  
真逸及母李氏盡孝遇弟士虎能友士虎字文亨本從

姑之子與公同繼真逸為性剛果公每濟之以寬內篤  
恩愛外極彌縫家務大小咸當其可公之助居多由是  
家日益裕又加潤色焉真逸晚歲優游之趣甚適公所  
生由文煥而下六喪未舉公竭力營厝悉如禮同氣四  
人兄可珍弟可立揭家從徙長沙公賙之有方既而夫  
婦俱亡公殯其二喪撫其諸孤使之咸有所憑藉女兄  
適印岡羅氏相距六百里饋問無虛月其他賑貧卹難  
施諸外人無少難色每歲發廩務平其值庚午大侵則



損直傾積以濟存活無筭平生讀書一見隨了大義有  
所得輒加體驗而行當道薦以文學掾力辭不就家居  
命僮僕治生一經拈畫即不以嬰懷惟與士大夫游樂  
而忘倦蓄古書畫暇日把翫清談纚纚不絕城東作三  
友亭常領客觴詠歲癸酉游南嶽登祝融夜半望海日  
超然有從方外之志乙亥歸廬陵徧脩先塋之祭退而  
會諸族鄰姻友驩甚是年真逸年九袞歸為真逸壽擊  
鮮高會遶膝奉觴鬚髮斑白座客歆羨未幾真逸病侍

病勞勩及卒哀慕過情喪事甫畢公亦感疾逾三旬未瘳一日忽呼二子語之曰民生在勤勤則不匱汝曹勉之越數日疾復作瀕殆有僧怪牛素所往來問之曰究竟若何舉手畫一圈曰平生受用不離乎此子問家事不荅啟手足示之脩然而逝後至元二年丙子五月十有二日也三年丁丑十一月庚申塋善化縣龍坑之留思嶺公性忠厚喜愠不見顏色訓子弟能以身教有質問必中理得年五十有六未弱冠來繼真逸始終幾四

十載父子慈孝如一日中外無幾微間言難矣哉初娶  
胡女一人適廣東宣尉副使聶公以道次子孟宣劉氏  
子一人德輔李氏子一人德文皆克肖孫男女各一銘  
曰人生至難為後於人其難維何尊尊親親既區別  
尊有隆殺君子處之先識其大所繼所生置身其間不  
爽其宜得譽匪難于嗟禮廷勤適厥中於分則嚴於情  
則通歲踰三紀恩義周浹至誠感孚靡間靡諱墳墓我  
省譜圖我脩兩宗訢合二郡綢繆廬陵長沙地壤犬牙

段氏蟬聯克昌厥家里稱善人士曰善士生有處譽沒  
蕃脣祉湘江之壩卜兆允臧魂魄所之咫尺故鄉慶源  
川增後人其承惇史作銘詒爾雲仍

元故隱士更齋先生錙公墓碑銘

公諱過字益翁更齋其自號也幼穎悟日記數千言稍  
長受學里中王珏王客故相江公萬里家其弟信豐宰  
達父往來公從兩王先生咸稱為畏友又嘗侍先君子  
登巽齋歐陽守道之門由是須溪劉辰翁中齋鄧光薦

皆以忘年友之先君子博雅能文須溪號之曰山中小  
集古尤偉公論議馳騁墳素軼出旁行敷落躡蹠虞初  
稗官劉氏雖好辨者終不能傲公當世務搶攘衣冠家  
子弟類巽慙不更事公器局散朗應對閒暇父兄賴之  
以安至元元貞間境有山盜公承檄扞禦能申條教齊  
一民義里閭帖然間歲侵輒殺直以發飢者為饘寒者  
為衣殍者為棺靡不終惠家居敦叙倫紀姻戚困乏者  
委曲料理卒使之有業性好客善謔歲時燕集酒酣歡

洽擊節雅歌四座為悚尤不喜異端然時有佳者亦為之豁達無忌初號一山時慕蘧大夫之賢著號更齋先輩耘廬鎔應登記之諸名士有詩生平裕有才諳薄於官情分憲觀復馬公昭舉行鄉飲酒禮公侍先君子座側馬公愛其英爽欲辟以掾屬力辭御史方厓蕭泰登於公為中表屢勸公仕輒不答晚歲順適丘園容與翰墨嗜古圖畫市或千金為知己持去亦輒委置家藏古書甚多皆手自校讎言至所著作才既敏贍率易天成旋

復散逸它日門客子弟始彙成編嘗即先廬之傍改築  
新宅將以逸老扁其樓曰望雲不敢忘先人也泰定丙  
寅哭其長子慟然時能命客自遣自是嬰疾疾革呼孫  
揆寅語無他及惟誦少陵微爾人盡非之句脩然而逝  
生以宋開慶己未前十一月十五日沒以元泰定丁卯  
閏九月二十七日年六十九歲曾祖從龍祖有開宋迪  
功郎安吉州烏程縣令父惟憲南軒書院山長皆山翁  
也娶戴母族以賢婉稱子男二士元士榮士元先公一

歲卒士榮早天女四人俱適士族男孫三揆寅揆辰揆  
申皆以儒學應徵辟孤孫揆寅以至順壬申十月二十  
二日奉公柩墓于里之烟竹原事竣屬其姻戚易君景  
升狀公行謁余請表其藏易余校藝江右時所得進士  
而余亦素知劉公學行節槩凜有古風若揆寅之世家  
學亦士大夫之所願友者故為銘曰民生於三父師其  
二倫序有五其一友誼偉矣劉公名父之子隆師親友  
抑又名士三者之懿筌知其賢矧公學行允也可傳學



以事君行施於政慤不少試斯焉有命命固有之公亦  
高蹈用不于時而適于道邁達者氣騰蹕者辭庶俾來  
世知公于斯新居奕奕花竹斯蒼日月幾何松栢旆旆  
有濬其澤由孫及曾太史撰銘悠久之徵

元故隱士廬陵劉桂隱先生墓碑銘

廬陵劉桂隱先生卒後之三年子應麟遣孫理來京師  
請其墓銘於玄值世多故未暇請也又三年遵東海以  
歸乃致前請謹撫其行狀叙而銘之先生諱詵字桂翁

號桂隱其先清江之翟斜族也翟斜之族自宋公是公  
非弟兄叔姪以文學聞天下號江右三錙先生之先世  
有諱滔字禹績者由翟斜徙吉水之南嶺傳六世至彦  
升彥明兩弟昆升留處南嶺明分處北坑北坑以地居  
上游號上族因號南嶺下族升自鵬舉五子競爽第四  
子曰倜字端臣生子少齊字思賢是為先生之高祖考  
少齊生子散字德卿宋太學內舍從誠齊楊文節公游  
子鈴字衡甫受知文丞相號麓隱生子仁榮字雲祥號

習靜與弟化龍長子元方同領景定甲子鄉薦明年俱  
及進士第雲祥受平陽尉先生平陽第四子也生二歲  
失母七歲失父九歲宋亡奮以穎悟之資自樹羈孤之  
中能不墜先業又斥大之今之大夫士論先生德行道  
藝必推本其先人於是平陽之聯科雖不獲究用於季  
代因先生克紹咸稱其有子而錙氏自翟斜而下益有  
光焉先生之為德不為世俗之所搖攷不為風聲氣習  
之所淪染卓然以重厚醇雅進與鄒魯士埒而無忤容

事諸父及諸昆弟盡恭敬友愛之道先世恒產悉推讓  
之子姪及門必厚遇以禮伯氏蚤世其子古臣方幼撫  
育教誨使有成立古臣卒又撫其子如古臣夏氏女沒  
所生角羈未亂教育而婚嫁之如禮晚即南嶺創始祖  
祠率族子歲時祭祀以正昭穆之叙居家處鄉有古君  
子風訓學者能以師道自立至其為文根柢六經屬饜  
子史躡蹠百家渟滙演迤資深取宏槩矚哲匠達于宗  
工液古融今自執其韜應慮不獲靡施弗宜雖未嘗露

其雋傑廉悍踔厲風發之狀韞玉在櫝氣如白虹不可  
掩抑四方求文繼屬于門有古文若干卷諸體詩若干  
卷駢麗書劄若干卷總題曰桂隱集蜀郡虞先生豫章  
揭先生及玄皆嘗叙之各以所見極其形容詠歎之盛  
然以先生之文徵吾三人言有不行世者乎先生歿吉  
之弟子顏成子狀其行稱先生年十二三時長於宋季  
程文若律賦論策臨文沛然蔚有老氣宋之遺老鉅公  
若季公鶴田肯堂深齋三公於先生為母黨尊行一見

即以斯文之任屬之中齊鄧公湏溪鎰公於先生為鄉  
先正見其文尤加器異鄧公嘗延之家使範其子若彭  
巽吾晏山心於先生為畏友往往推服延祐初科舉復  
興先生纔四十餘州里有司舉孝悌明經經太守強勸  
之駕先生好古與主司瑟竽理之必然不足深論先生  
退自塲屋一時名家欲其子弟規進取者必厚幣求師  
事之古有善射者射牛鏃掠牛腹舍麕詣精以不中為  
勝賢父兄願欲得其不中之奇他日與拘拘然求中者

角我欲中斯中耳方厓蕭公為御史以教官薦學山文  
公為集賢以館職薦尚書鵬南鄭公過廬陵見之歸朝  
以遺逸薦公卿推轂當時賢士推轂者可得美譽賢士  
何為焉先生生以宋咸淳戊辰八月二十六日卒以大  
元至正十年九月十三日年八十又三葬以是年十二  
月二十五日墓在州之仁壽鄉東槎灘娶印岡羅氏有  
婦德能致內助先二十年卒子男三長立敬先五年卒  
仲尚文克世文學先生鍾愛之惜蚤世季應麟業進士

女四人適同郡李以孫夏昶彭鎡蕭泰端皆宦族孫男  
七觀先天次珵瑜諒璉讓珣珵今除龍溪書院山長孫  
女八曾孫男二玄于先生未獲一識而書問不絕相知  
為深虞公晚歸田過從甚樂每有相見遲莫之歎虞揭  
二公皆先卒玄以垂髫之齒獨得銘公銘曰宇宙氣化  
消長有時斯文盛衰不繫于茲富貴倘來非悠久功名  
時至亦易就惟茲二事衆可勗天畀斯文曰予獨近代  
四家廬陵眉山臨川南豐頡頏其間展也桂隱實宗歐



陽豐曾約蘇謹嚴歸王天慙其施不靳所重我其承之  
賁若先寵在衆不隨予獨不訾不貶厥齊俾昌於詒

元故旌表高年耆德山村先生歐陽公墓碑銘

至順元年冬十有二月南郊禮成詔天下民年八十以  
上無失德者有司以高年耆德旌表之表之分宜山村  
先生歐陽公是年九十以齒以德當應詔元統改元又  
詔賜高年帛公年九十三縣大夫來致帛見其人物議  
論之偉驚且喜曰此豈徒有年者哉二帛未足以示優

禮也詢前詔旌表猶未徧舉方謀為之請玄適在朝登以文白當道檄有司奉行之於是旌表將至偶近公生朝子孫請即是日拜命為壽有司從之比至疾遽作竣事未幾卒後八年玄謁告南歸訪族防里至公之門旌表熒然而宰木拱矣子惟德以里名士孫復孫所狀公行請銘其墓玄忍銘乎忍不銘乎公諱涇字源清號山村先世自安福令而上詳見吾宗楚國文忠公譜令以下數世有自安福遷分宜防里者至公傳十有六代代

多文儒曾祖安世祖必恭父起宗皆教授鄉望世父龍瑞登宋咸淳七年第公資貌偉特少以力學得羸疾有授以食療法久乃魁岸性孝友執親喪至柴瘠每起必杖為親擇墓地術家言某兆吉公曰何自致之曰以公孝感當自致已而果致季弟目青溫良饑飽謹候伺之如是數十寒暑無幾微倦色沒而哭之盡哀塋之盡禮倫誼之重里人至今以為式家居飭子孫常舉平心待物四字為訓能以身教故子孫率從由是忠厚日積致

家日肥奉養日腆而公如素之習不改平生被服前代  
衣冠未嘗稍易華靡子孫亦不能強之暮年身健神清  
稠人廣坐與一二同輩談承平舊事移日不倦歲時會  
族少長咸至多至數百指語子孫曰天倫之樂無以踰  
此饗餼隆殺非所計也爾後人毋廢斯禮早年習舉子  
業精敏有聲場屋與季父同登俱待補國學葉丞相守  
表遇士慎許可見公之文獨稱賞求識公面屢加薦達  
至宋亡科舉廢乃更沉潛性命之學手編諸經傳註彙

粹先儒格言其精義奧旨融貫演繹多所論著細書大帙充牣中廂詩文理致自足不事雕剝舉動一出誠恪不勞矜持嘗有老僧一日同集人見其跼蹐於坐詢之曾從出學公教學者無他言唯勉其用功根柢異時少自樹立即有依據後進往往佩服其言生以宋淳祐辛丑六月二十六日沒以大元後至元乙亥十一月十一日年九十有五沒之明年丙子八月某日塋于里之小礮源娶某氏先公卒子男一惟德字秉彛幹蠱有譽克

大厥家公歿之歲子已稀年今將八十康勁勝常人每以公壽期之孫男二務敏務實皆業進士曾孫男一玉成孫女一適彭曾孫女二長適朱少適許皆名族立於公為族弟先世徙瀏踪跡雖遐知遇獨深銘墓之請誼不敢辭銘曰惟公之身實備五福壽躋期頤富有第祿第祿雖富公恬不知曷其康寧豐約不移惟其不移可久處樂耽書味道生不飲藥好德已稀況德之積迨夫考終數不滿百太璞未斲全福有人豈獨全福有行有

文有文匪他惟性惟理以淑其徒以遺孫子有覺其閔  
國旌壽駿天光所臨百世流潤爾孫爾曾赫奕其承同  
宗匪吝惇史足徵

居士歐陽南谷墓碑銘

居士諱同寅字同甫號南谷袁之鈴岡防里人也世為  
望族家饒貲尤多儲書居士自幼為學質實既長賦性  
剛塞居家庭有孝行處鄉黨有直聲輕財而賤利貴義  
而重德姻族有孤遺少任其教育長釐其嫁娶里中貧

乏者飢有其粟死有其棺殮有其域歲旱先其鄉人禱  
不大雨不止鄰有災集救賞募燬夫必撲滅乃退人有  
訟求正善譬折以理閭閻細民有戒心來歸輒聚而保  
之五六十一年之間未嘗希知過于當世故已之德人者  
甚鮮人之德已者甚多嘗訓諸子曰處善循理人生至  
樂仕宦何為當道以教官薦辭不受又嘗自贊其畫像  
有曰務本之學施于孫子士稱其言先行而後從晚歲  
家居優裕肆力于學適意于文廣坐辯論經旨專門士



或病之天歷己巳夏五月疾作醫至却藥不飲疾甚諸  
子請所以命輒厲聲曰若輩皆四五十之年猶待刺刺  
語耶有間曰張公藝九世同居惟一忍字汝曹識之端  
坐正衣冠而瞑是月二十日也得年七十有六至元丁  
丑十二月壬辰葬臨江新喻鍾山鄉龍伏之原曾大父  
峻大父珣父夢顯積德起家初娶鍾氏繼室許氏皆先  
卒子男四震亨晉亨巽亨克世家學鼎亨仕八蕃有招  
蠻功宣撫司辟薦以官聞母喪歸不就巽亨仕湖南辟

清湘縣儒學教諭以親老辭女四適李適彭適胡適劉  
皆里名家孫男四長天祐次天福蚤卒次天與天啓孫  
女七曾孫男三曾孫女四吾歐陽氏以有妣支裔封越  
後并於楚受封於烏程之歐陽亭侯子孫以亭侯為氏  
歷兩漢涉魏晉六朝唐宋迄今南北歐陽惟一族非如  
他姓各有所從始者然自涿州太守而下顯者曰冀州  
渤海青州千乘千乘中絕今皆渤海後又自率更令而  
下顯者曰長沙自吉州刺史而下顯者曰廬陵其實出

於一詳見唐書宰相世系表及我兗國文忠公譜說居士先世繇廬陵之安福義厯遷今防里上世有府君諱俸在諸昆弟中子孫多遷居外郡有復遷安福之早禾田有遷潭州之瀏陽馬渡者若是者不一居士亦俸後於防里其處者也玄之於瀏陽遷者也由始遷至先參政冀國公纔三世故世次可考居士於冀國公族弟也玄於居士族子也異亨來京師求表居士墓義不敢辭為之銘曰才周世用世用則訥德應人求求人則恡我

宗儀刑遺不我慙我表其歲三世其親

讀圭齋先生所撰南谷居士墓碑知昔人之所積  
者忠厚深長其遺諸子若孫固異乎衆人也自凋  
謝之餘而資源昆弟皆卓然復昌其先世又知天  
之報施善人果不爽也嗚呼世之人何苦而不積  
善哉

洪武二十四年六月二十有二日翰林黃子澄書

永新龍母吳氏墓銘

畫而出必掩面幽其明銘何炫宵而行必秉燭明其幽  
銘何瀆生存正沒順寧酌二義可也銘婦之冢嫂之丘  
緊吳氏羅其憂事莫難彞倫間公無怨私無瘵姑宜家  
叔宜室卑者勞尊者逸城有屋郊有居相夫子手拮据  
子於親無二上禮有別孝無讓父之命子之誅人信之  
惟天理惠于宗德于鄉宜太史銘其藏

余拙於書病餘愈拙近者求予文者多強予書余不  
得已力書以塞其請然實非予之素志也禾川龍孝

子謁其母吳氏墓銘獨能見諒於是請太常博士劉  
聞大書余甚嘉之因書銘後使知得余書者不如諒  
余書者之使余感也致其辭來請者其西賓戴與權  
也其人甚賢使余不忘歐陽玄書

元處士劉公梅國先生墓銘

公姓鐺氏諱隆瑞字立賢世為安成望族幼穎悟力學  
家居孝友遭父母喪勉力襄事動循禮則宗黨繩之遇  
諸子姪獎借誘掖期于成人才性跣弛輒加警約劉氏

塾業彬彬可觀公教居多世變桑海舊家子弟巽懷奴  
客乘勢恣睢公奮以法鋤拉強梗至元甲午獠寇陸梁  
青山朝廷遣簽樞督捕輒欲禽獮其鄉聞者竄匿公遠  
迎大軍供億畢給民用無恐豪右有宿憾於鄉伺間報  
復公辨出無辜活者千計寇平師旋居民殘燬札瘥薦  
臻公被府檄勞來遺氓賑飢療疾流亡四集有司築堡  
壘以戒不虞公曰軍名備禦實則病民卒言大閫遂撤  
其戍民迄今便之公機警倜儻踈財樂施為人慤難觴

糾德色不見幾微晚歲延名師淑諸孫暇日觴詠暢適  
泊然無求於時所居多梅因號梅國先生至治壬戌四  
月十五日卒明年十二月十六日葬鄉之南山壽五十  
有八按狀劉氏在南唐時有為袁州刺史者始遷安成  
蜜湖傳至克都府君再遷南溪五世為評事府君良輔  
二子長迪功郎龍南尉汝次脩職郎沅陵令崧沅陵子  
醴陵令孔彰善誠齋楊文節公萬里醴陵子墳墳子鑑  
以文學顯終承事郎秘書省校書郎秘書生天福修職



郎廣西帥司幕官是為公之考號恕齋澗谷羅公倚婿  
之嘗及接見後村劉公克莊為人慷慨多智畧與文丞  
相有嫻好雅見器異須溪錨公辰翁青山趙公文靜德  
王公夢應復心崔公君舉巽吾彭某皆嘗與之遊君子  
於公行義之卓尚論先世蘊蓄之深先友過從之盛而  
知其負挾有自來矣伯兄震漕貢進士仲兄薦補國學  
生咸有士譽公娶王氏女有婦德能持家後公一年卒  
子熒字持敬孫曰漢善鵬嵩岳正泰鈞貫凡九人述行

狀者湖南宣尉副使周君志仁介燧請銘者太常博士  
劉君聞也玄識燧久銘何可辭銘曰安成在漢隸邑長  
沙十世有美蜜湖是家處士侃侃濬厥義問秩若紀綱  
不煩以紊範族以正剗物以剛抑浮惇雅植弱耕強麗  
嘯于鼓王師薄違鴻飛于渚公曰曷歸素箏軍門其勇  
萬夫馳其有餘翼蔽一隅孰弱爾巢我堅爾屋孰芳爾  
田我序爾粟民將德公尸祝百世公曰噫嘻我求無愧  
衆芳所都紛郁粹醲涵泳堯仁優游以終彼秩三品奉

常斯謚法當立傳太史乃議奉常言之銘者太史儋是  
寵光展也君子松栢鬱鬱君子之域宜爾子孫維德之  
植

元翰林侍講學士中奉大夫知制誥同修國史  
同知經筵事豫章揭公墓誌銘

至正四年七月壬辰翰林侍講學士揭公曼碩以總裁  
宿史館得寒疾歸寓舍戊戌薨時京師大雨彌月朝縉  
大夫聞者不避泥潦馳往哭之人人盡哀明日中書出

公用鈔二千五百緡率先為賻於是樞密院御史臺六部以下咸致賻儀有差車駕在上京適遣使賜諸總裁及史官燕勞以公故咸援禮辭中書為改燕之日使者歸上京白宰相宰相以聞有旨賜中統萬緡給喪事有司議以驛舟送其櫬歸江南孤泐奉史官劉聞所狀行詣玄謁公墓銘玄與公三為同寅相知為深公死為之哀痛踰月不能忘故不銘有所不忍銘有所不忍九月泐將扶護登舟廼勉叙而銘曼碩諱僕斯姓揭氏生而

穎悟年十二三讀書屬文即知古人蹊徑家貧不能具  
束脩從學惟蚤暮刻苦父子兄弟自為師友稍長豁然  
貫通日有增益未弱冠里大家延之授業諸生年或相  
等皆以師道嚴憚之二十餘負雋譽游江漢間司徒程  
楚公為湖北憲使奇其才妻以從妹皇慶初程公入朝  
公館其門時國初諸老尚存聞程公有佳客咸願識之  
及與之言薦恐後延祐元年用薦為翰林國史院編修  
官三年陞應奉翰林文字同知制誥四年遷國子助教

學士承旨復奏留之五年謁告歸泰定元年復授應奉翰林文字丁內艱去職天歷二年秋文宗開奎章閣置授經郎教勲舊大臣子孫於宮中公首被選至順元年預修經世大典三年書成超授藝文監丞叅檢校書籍事元統遷翰林待制後至元四年擢集賢直學士五年奉旨代祀北嶽北海濟瀆南鎮竣事引疾便道由浙左歸豫章六年以奎章供奉學士召未至改授翰林直學士知制誥同修國史至正改元兼經筵官二年陞翰林

侍講學士且命同知經筵事三年年及七十請致仕歸  
上聞亟遣使追及鄴南拜表力辭再遣使奉上尊諭旨  
還撰明宗皇帝神御殿碑文成求去不聽夏四月詔修  
遼金宋三史命右丞相為都總裁中書平章政事特穆  
爾達實罕凡六人為總裁官公預其選遂不得辭明年  
遼史既進金史垂成公薨壽七十有一揭姓相傳出楚  
司馬氏世遠姓稀譜逸或云出漢功臣陽信侯或云出  
安道侯漢以後揭氏居高平居汝居郢唐乾寧中有諱

鎮者以左僕射持節袁州刺史揭氏仕東南者昉見於  
此今江右諸揭居豫章居盱廣昌皆大族豫章族始祖  
稹盱廣昌始祖填推其訓名蓋稹填伯仲曼碩居豫章  
豐城今為富州曾祖先朝妣黃氏祖性聰累贈嘉議大  
夫禮部尚書上輕車都尉追封豫章郡侯妣黃氏繼何  
氏並追封豫章郡夫人父來成以邃學篤行見推前輩  
先賜謚貞文先生贈中奉大夫江西等處行中書省叅  
知政事護軍追封豫章郡公妣黃氏追封豫章郡夫人



皆以公貴推恩初娶李氏繼程氏荆湖北道宣尉同知  
巖卿之女先公卒並追封豫章郡夫人子男二長泫國  
學上舍生克世父業李氏出也幼廣陽生始四歲女一  
人適秀才楊湘孫男一敬祖孫女一公職子弟未嘗有  
纖芥貽其親憂昆弟有無相通始終無間言少自處約  
立身泊有祿入服食稍踰於前輒愀然思其親曰吾親  
未嘗享此故平生清苦儉素老而不渝在京師三紀官  
至五品出入始乘馬為授經郎諸貴游子弟見其徒步

每蚤作宮門辨色輒先諸侍臣至謀為之貫馬公聞之  
自置一騎尋復驚之示非所欲初遊湖南見前宣尉文  
惠公趙淇趙素號知人謂公曰君他日翰苑名流憲使  
涿郡盧公摯見輒稱許其歸朝竟以翰屬薦之薦牘今  
在掌故至京師受知太保李文忠公孟樞密王文定公  
約承旨趙文敏公孟頫學士元文敏公明善先是東南  
士聚輦下如四明公楠巴西公文原雍郡公集有盛名  
公卿間既而貢集賢奎章周待制應極薦之皆馳騁清

途公與清江范梈德機浦城楊載仲弘繼至翰墨往復  
更為倡酬公文章在諸賢中正大簡潔體制嚴整作詩  
長於古樂府選體律詩長句偉然有盛唐風楷法精健  
間雅行書尤工國家典冊及功臣家傳賜碑遇其當筆  
往往傳誦於人四方釋老氏碑板購其文若字衮及殊  
域門人集其所著已板行於世在國史時李文忠公見  
所修功臣列傳撫卷嘆曰他人謄史牘耳若此方謂之  
傳在奎章時上覽所撰秋官憲典驚曰茲非唐律乎又

覽所進太平政要四十九章喜而呼其字以示臺臣曰  
此朕授經郎揭曼碩所進卿等試觀之其本常置御榻  
側為經筵官今上聽其講篇深嘉其忠懇故其際遇累  
朝皆非疏遠儒臣所敢望者延祐末朝廷倏罷羣臣贈  
典公之父獨得賜號貞文又賜之碑天歷至順中大臣  
有薦文士人主必問之曰其才比揭曼碩如何累稱其  
才可用欲器使以政今上初即位一日使衛士召公至  
則以內府所賜諸王段表裏賜之將賜躬自辨識然後

以授講經退又賜金織紋段至正改選格諸超陞不越  
二等公由中順大夫進中奉大夫獨不為例超授四等  
轉八階進神御殿碑特賜楮幣中統萬緡白金五十兩  
中宮亦賜白金如其數又為之賜貞文書院額仍許置  
學官若此異數公受之踧踖不見幾微自銜之色而許  
國之志益自奮厲故處散地論政薦士以古人自期王  
文定公嘗言與揭公談治道大起人意對大臣言其辭  
不及他第言某處災傷未賑卹某政弊未除某人賢在

下位未擢用自漵南召還丞相與侯見便殿因問方今  
治政何先公曰養人養人何先公曰人才當譽望未隆  
之時養之在朝廷使周知庶務一旦用之自識治體及  
置史局又問修史之道何先曰收書用人又問用人何  
先曰用人先論心術心術者修史之本也心術不正其  
他雖長不可用公求去之意未釋上使丞相及諸執政  
面諭留公公曰使揭某有一得之獻而諸公能用其言  
天下遂獲其利雖老死於此不恨不然何益之有他日

集議東內公倡言鈔法大弊合用新舊銅錢權以救之  
政府不樂論議辨駁示以顏色公辨不少變丞相心深  
敬之故人才因公言知名善政因公言張本公出不以  
告人人亦鮮知之惟豐城地不產金而金課益倍為害  
歷年公上言罷之集賢考校諸路學官所業下胄監移  
博士吏文淹滯儒者公請改其制以其事付本屬官竟  
得奏允御史言下第舉人以充學正山長鄉舉放次榜  
以充教諭學錄廟堂以咨公公力贊成之此世所知者

考鄉試會試一廷試為讀卷官二國子監公試七多得  
名士後居要路所教勲舊子孫後多為重臣公待之泊  
然不矜詡以為聲援於程公禮若賓客人弗知其為肺  
腑親性耿介易直好善惡惡表裏如一聞郡縣有一廉  
吏他日臨文必旁引曲喻以極其稱道或恐其過聽失  
實公則曰如是猶不足以勸善况敢億不信乎至聞吏  
有貪墨病民論之曾不少恕嘗有郡侯以勢諷其部民  
奉金為公壽求文記其德政公頗知其人斥之曰汝郡



侯所行如何吾敢有以飾辭為諛乎其人未幾以賂敗  
朝中名臣意趣或不與之合終身不一造其門雖嘗以  
是為軋公曰吾之進退用舍一聽諸天人何能為世路  
齟齬時或不平心有所感形諸詩文傍觀謂其太甚公  
曰言當如是不必慮也其遇善類及新進諸生乃復恂  
恂汲引莫年求文者多寢食為廢子弟數以為言公殊  
無厭苦意有客為人求文而私其金公既予文他客發  
其事公曰已受之矣終無所言聞者稱其長厚臧獲有

過徐以理責之人問之曰長上遇下稍見卞急後生便

習暴戾當以身教稟性堅壯動作簡便羣下易事公集

必蚤官事尤勤進遼史後有旨獎諭史官早成金宋二

史公奉命黽勉朝夕匪懈先代故事臧否奮筆書之身

任勞責不以委人屢言今人徒知求作史法不知求作

史意古人善言雖微必詳惡事雖隱必書其意主於勸

戒耳當暑濕盛作移居館中頗自恃其精力踈於攝生

遂致疾不起昔玄與公共脩憲典公素習律儀又勤於

玄其書大半成於公今又共史事公之勤不減昔時乃  
遽失援公未病前數日謂玄曰某平生愛公文恨無因  
獲一言早晚史事成求公作貞文書院記記成而刻吾  
志畢矣玄敬諾之悲夫斯言詎意未記書院而先銘公  
之墓乎玄卜葬某鄉某原期以某年月日預為之銘銘  
曰古稱良史造物忌予敘是非擅萬世嗟公直筆廉不  
刷獎善懲惡義之比惡書不貸善書亟寒暑晝夜勦形  
思公起南服抱腹笥布衣徒步品第二尚方召見呼以

字致君惓惓効獻替講經作史出一意陳規進戒為已  
事惜哉負挾勤少試徒抒精忠載言議感慨論列時出  
涕唐之甫也漢之誼以文發身卒以斃豐城故墟干將  
瘞夜占斗牛有文氣將徵遺篇錄後裔

元故承務郎建德路淳安縣尹眉陽劉公墓誌  
銘

至元二年冬十月十五日眉陽鐫公卒於衡山之私舍  
三年春正月同年友廬陵歐陽玄聞訃哭諸寢門之外

三月其門人衡州路推官何克明以書及所撰公行狀  
致其孫圭之請來謁其藏銘何君之言曰衡山為邑自  
武夷胡氏廣漢張氏寓居是邦學者宗之凜然一趨於  
正後是百餘年眉陽鍾公父子實來使告邑人子弟私  
淑胡張二先生之訓久而彌章則其薰陶啓迪之助居  
多今不幸即世母老孫幼至以身後屬其一二門人門  
人願以不朽託公之同年惟先生義而銘之庶幾公猶  
未死也玄讀之歎歎夫同年以科目為昆弟師友以道

義視父子師友廢道義不明同年垂科目不振人情死  
生之際天理存亡之機其所係也大矣吾於劉不銘忍  
銘之乎公諱彭壽字壽翁家譜載其先本漢中山靖王  
裔隋時有諱建者仕為大將軍漢王諒使略地燕趙將  
不直其所為棄官入蜀家於隋十一世祖貞仕蜀署眉  
州司馬蜀亡宋召入復官之卒贈銀青光祿大夫五世  
祖貞卿字純老為廣漢軍司法至曾大父演字謙叔號  
中山由丹淩遷眉之金流鎮是為金溪中開禧丁卯潼

川轉運司解有文集號雞肋傳於蜀大父蕃卿字子才  
號默齋登淳祐丁未第尉紹熙之靈應改教授邛州僱  
州倅壬子蜀被兵出蜀之荆南卒焉考淵字學海三領  
鄉解嘗以春秋冠全蜀內附初避地嶺南之桂尋之象  
還寓衡陽署號象環卓行篤學為士楷模事母至孝者  
年修子職尤謹用薦為永州路學正既沒門人私謚曰  
永政先生公幼穎悟侍父瘴海不廢家學弱冠負才  
雋辟衡山縣教諭重闡康強公以薄俸迎養菽水怡

然父子授徒從學雲集久之樂衡山士習之美遂留居焉再調武岡路儒學正秩滿待教授選會科舉行延祐甲寅初科以春秋貢湖廣乙卯登第賜同進士出身授將仕郎桂陽路平陽縣丞轉岳州路行用庫使陞承務郎建德路淳安縣尹授代還踰年卒年六十有四先妣彭氏公名存外氏以志孝也迎養繼母于涖西年八十餘公卒深哭之公娶白氏用公貴皆當有封贈循資請于朝命未下公歿子一人侶女一人適茹蕃侶舉湖廣



鄉貢進士遇恩調衡州路儒學正應選教授先公一年  
卒公以繼世之重為之哀經及期竟以憂感嬰疾疾革  
門人江雲端劉延雋輩咸在將屬續語延雋曰生順死  
安無遺恨也第老母不得終養孫圭幼未之學子教之  
而才吾受子賜言訖乃瞑圭以某年月日奉柩葬于某  
山之原公為蜀名家世明春秋之學自曾祖演至子侶  
五世一經相傳科第接武家多著述象環先生有讀易  
記易學須知春秋例義春秋續傳記左傳記事本末周

正釋經古今要畧等書公所校讐增附不少其自為書  
有四書提要春秋澤存春秋正經句釋易詩說未脫藁  
生平所著文集門人方彙編之初科舉未行公教學者  
必以五經四書為本為文必先理趣而後詞章及科詔  
頒悉如公所為教故高第冢嗣以取科名校文鄉閭門  
生多擢高甲在衡山時部使者涿郡盧公摯廣平趙公  
厲皆時名公一見輒遇以老成在岳陽行中書省平章  
魏高公昉拔自筦庫館之幕下屢以行省提舉薦不報

迨其為政勤於治民而疏於奉上故當時惟賢者知公  
玄與中丞浚儀馬公祖常侍御濟南張公起巖叅知政  
事相臺許公有壬同朝暇日論及同年士五十有六人  
二十餘年聚散不常升沉不齊其間存亡疑信幾不忍  
詰至于劉公則往往相視有荀慈明愧陳太丘之色適  
翰林編修和達來自淳安能言公幅巾深衣每月初吉  
陞座講書淳安士庶聽講無倦致邑中風俗丕變玄明  
日白諸公曰方今宇內州路縣大夫皆有師帥之責於

其民其能服先王之服誦先王之言卓然以承流宣化  
為已任者嘗屢見其人乎諸公方懷論薦公遽不起噫  
命也夫公葬象環先生衡山先塋之原名其阡曰岷衡  
因號我山銘曰誰謂岷遠百川其支誰謂衡高景行斯  
齊誰謂公死遺書在茲遺書在茲使我悲之銘者是用  
不費于辭

元故將仕郎臨安路錄事羅君墓誌銘

延祐二年仁廟初以科目取天下士左右榜得五十六

人時朝廷驟黜舊制一以經學行義取人所得士非故  
業舉子以應時需者十五六年間司風紀掌綸綍內綜  
機務外使絕域才不乏使其間居位勇退能以風義先  
天下則惟羅君求師一人求師諱曾家廬陵新安里登  
第授將仕郎寧都州判官再調臨江錄事以初授官終  
焉其退非有扞格不偶亦非以材具不適時而所慕有  
大於此者惕乎若不能以斯須留故同年之士聞君之  
風反自修省失所負挾怡然欲爭君之高而莫之能也

君至寧都蔡冠甫平凋瘵未復奮以身任撫摩艾其強  
梁薙去宿蠹久乃安堵臨江素號繁劇吏初疑儒者劣  
於剴裁君夙夜勤恪事無留難暮年網紀修舉一日聞  
親有疾遂棄官去自是不復出仕以死惜哉羅氏吉望  
族曾祖士友宋承務郎致仕士友母年滿百故相文山  
文公與其子弟有斯文昆弟之好奉幣載酒升堂拜母  
題詩廳壁鄉里榮之曾祖妣蕭氏恩封孺人祖塋父寅  
君孝出至性親病自臨江歸拜醫嘗藥衣不解帶親終

毀瘠異常禪除餘年哀不忘嘗廬母錮氏墓蔬食數歲不變  
事繼母習氏尤孝其死習慟之切至其平居終日忻忻喜愠不色  
蒞政廉約遇物謙沖自束髮與人交不見幾微褊心登第偕同  
年蕭君立夫舟還蕭僕死給以已從蕭病臨清一月君一月  
留甘苦燥濕共之未幾蕭即世教其孤遺長妻以女其所為  
不愧古人類如是泰定四年丁卯十有二月二十二日以疾卒  
于家享年四十有五以次年某月某日塋于廬陵之清湖  
娶文氏子男一人會之克世其學造物之報庶幾在茲女

四人長適蕭霽餘幼霽即立夫子今江西鄉貢進士狀其  
行來求銘嗚呼余于君為同年又同生昭陽協洽之歲霽  
來始聞君之訃乃哭諸寢門之外為之銘曰雅之烏烏不  
止于藪而集于枯車之戰戰不馳于坦而陟于阪嗚呼羅  
君士之以為難兮君固即所安兮而卒老于一官兮

曾秀才墓誌銘

秀才曾氏子一漢既沒于江南其兄德元在京師聞而  
哭之慟知其墓有時奉行狀乞銘於歐陽玄拜且泣曰



人之生苟有德慧孰不願有辭于永世也弟一漢實曾氏才子弟今不幸短命父兄不能續以長願得先進一言以傳庶幾猶未死也玄聞其言惻然乃叙而銘之曾氏永豐顯親里大家一漢字明善本曾似翁第三子大父悼其兄之子似俞早夭無後以繼之大德十年丙午五月庚午肫生天歷三年庚午五月癸丑肫死是月戊午改至順以是年某月某日塋於某里之原一漢五歲讀書數千百言過目成誦少長無童心年十二三能文章

十五六頎然長以弁不尚浮靡不事貨殖篤志道德性命之書能服行其言事父兄善交朋友信遇宗族之長老恭未及壯有學行詞章凜凜超老成人初師里士劉福遠習舉子業精熟尋執贄臨川吳先生門受諸經說大稱穎悟年二十有五病痰喘以死方疾未甚四月十日有厲風從西北來拔並舍大木似翁著得未濟之巽心疑之不踰月一漢乃不起妻鐺氏子男一人萬奴裁四月而孤行述似翁所自作其文不勝哀有甚於德元

言者嗚呼為父兄鮮有不愛其子弟者論才不才恩義  
有不相掩者一漢死父兄若失希世重寶不能自存嗚  
呼一漢真佳子弟矣乎銘曰麟之不角麋不如殞鷗之  
不翰鷖不如鰕奪其有據無予之為瘡隳其垂成無生  
之為寧坎而深樹而樛無重傷其父兄之心

歐陽奇翁先生墓誌銘

先生諱文壽號奇翁姓歐陽氏玄之族兄也其先由廬  
陵徙安福之義歷復由義歷徙分宜之防里曾祖子敬

祖西園皆篤厚好施與鄉稱長者考登仕郎化龍慷慨

以功名自許妣李氏有淑德公生以闕年闕月闕日

卒以闕年六月十八日享年闕十有闕賢配彭氏出里

名族子所性才幹克家孫吾貫篤文學善吟詠頃予在

朝公遣姪勞予京師及謁告南歸又勞予於家囑叙其

譜詎意譜序成而公沒玄聞訃哭諸寢門之外不能堪

未幾所性懼公湮沒無傳屢以墓文為請將以圖於不


朽予雖欲遲之恐歲月逾邁無以盡情則於墓文又烏

可已耶公自幼穎悟甫數歲讀書過目輒成誦年十餘  
挾書出就外傳勤謹不懈鄰人有厭其夜讀者公焚膏  
繼晷諷誦不輟自若也公沒不勝哀慟廬墓三年而後  
歸仁宗族義鄉黨內外稱之無間言常恐子弟廢其世  
業延名師儒訓切之日復親督其課夜分乃止如是者  
以為常中年文學大進不求利達師表鄉閭晚節深居  
罕與人接見唯幅巾藜杖逍遙林壑間從一二賓客自  
娛其高尚槩可見矣以其年卜塋安福縣六十七都地

名黃竹坑坤申山寅艮向之原玄於公為族弟故不辭  
而為之銘銘曰裕已範世兮學行允敦內蘊弗施兮既  
臧且淳子克其家兮孫踵其仁勒此貞石兮其永有聞

圭齋文集卷十

謹案卷十第四頁前二行喀爾回舊作康里回今  
改 三十九頁前二行特穆爾達實舊作鐵睦  
爾達今改



總校官庶吉士臣張能照

校對官檢討臣盧應

膳錄監生臣徐松



欽定四庫全書薈要

集部

圭齋文集卷十一至  
三

詳校官助教臣謝登雋



欽定四庫全書薈要卷一萬六千四百八十四

集部

圭齋文集卷十一

元 歐陽玄 撰

阡表

安成劉氏儒行阡表



甲申安成劉君粹衷以翰林應奉爲後宋局脩史  
官未病前一月述其先世梗槩凡葬于里之儒行鄉者  
幾所總名之曰儒行阡謁余表之余諾其請矣粹衷未  
幾病作又未幾疾甚遣其子都來趣余爲阡表余有所

不忍也已而果卒哭之盡哀而告之曰古人有挂劔之義儒行阡之表余諾君請矣余忍有愧於古人乎越二年丙戌春余將南歸乃表之曰安成在漢屬長沙國定王發子孫衆多今安成劉氏獨多於他所蓋其後然安成之鐫亦有兩支焉其一曰南陽太守遐之裔遐魏元陽壻也考遐之先亦漢宗室粹衷性質直叙其先世起自五世直卿府君迄於父龍泉府君行實有可考者書之其不可考者則亦闕之而已矣直卿府君諱諤娶彭

氏沒合葬小唐之原子雄材字子厚生淳熙壬寅歿景  
定壬戌祔於先塋之東南娶李氏葬雙牌嶺繼王氏祔  
子厚墓右生三子長炳字季文歿於至元乙酉祔祖塋  
之左次煥煥皆無後季文生三子長應龍娶趙氏歿同  
祔李孺人墓側次祐孫娶鍾氏合葬由慈灣次承翁字  
德甫王氏出也累監吉水泰和吳城南康等稅生於宋  
淳祐壬子六月歿於大德壬寅四月祔祐孫之塋娶穰  
氏生景定庚申之十一月歿大歷之九月祔王孺人墓

右子輝字明卿生至元辛巳歿至治壬戌以子貴贈承事郎龍泉縣尹葬里之稼木塘娶楊氏封宜人子性即粹衷孫一人曰都此其自叙若此五世皆業儒其鄉又以儒行著名阡曰儒行誰曰不宜大夫士惜之者曰劉氏數世力學至粹衷始有祿爵於朝以粹衷之才使得中壽其所就豈可量哉余則曰天下之事惟不足故有餘日行一日不及天者一度月行一日不及天者十三度有奇是不足也積其不足乃有餘分及有置閏則氣

朔分齊而成功矣天且如是而況於人乎人謂之不足則錙氏之有餘慶者庶乎在此粹衷有經濟能詞章為旌德縣尹遷應奉翰林文字同知制誥兼國史院編修官余庚午科考試南宮所得士有斯文之契故為之表云

哀辭

蕭同善哀辭

人貴有後兮子貴為男男固可尚兮子職曷堪生而懸  
弧兮西東北南終老膝下兮壯志斯慚違親從祿兮孰

為旨甘榮與養俱兮此樂孔耽求備造物兮十無二三

一或缺望兮終身之嘆隱君有子兮詩禮是揮更習律

令兮讀例與凡卯以儒薦兮辰抱憤慘泝瞻隱君兮宰

木既嶄幸哉有母兮華髮滿髮兒服楚楚兮懷母擔擔

燕礎十霜兮吳桑幾蠶縮成望更兮匪進之貪生可為

養兮逝恩其覃歲月不貸兮枯魚之銜吁嗟隱君兮聲

流淪淪孝則愚史兮壽非彭聃遭世託條兮脫身戈鉞

負母遁逃兮賊鋒以成流血漸腓兮惟晦之咸創巨雖

遠兮永卹之函掾語反是兮煩憂如惓泰山有雲兮起  
乎崑崙膚寸裁合兮八翼可曇維此下如今氣升江潭  
將族而雨兮風醅其醺思溉根本兮澤弗及涵感彼何  
易兮順如馳颿此進獨難兮右跣履巉所處寔異兮命  
疇吊讒擔志不渝兮明神允監稅為哀辭兮視此幽劓



圭齋文集卷十一